

Fundacion na memoria di sr. E.J.(Watty) Vos:

Recordando sr. Watty vos riba 75 aña di su natalicio

“Pa bo por ganami, bo mester lanta prome cumi y drumi despues dimi”



WATTY Vos (1937- 2001)

Nacemento y estudio:

75 Aña pasa, pa ser exacto 16 di augustus 1937, na Weststraat 16 den Rancho e bario di piscadornan di Playa, a mira lus di dia sr. Edgar Joaquin Vos mihor conoci como Watty. Su persona tabata e di 4 for di 5 yiu di e pareha Salomon y Genoveva Vos-Tromp. Como estudiante Watty a bay St. Dominicus College na cual scol el a haya su MULO- diploma, tambe e tabatin diploma di adjunct- commies y abogado.

Deporte

Watty tabata un ex internacional di Aruba y Antiyas Hulandes den e ramo di futbol. Como miembro di seleccion di futbol di Antiyas a logra na Cuba medaya di plata despues di Costa Rica. Na Puerto Rico durante di e Weganan Centro Americano y di Caribe representando Antiyas e seleccion a logra medaya di plata despues di Mexico.

Watty a defende Aruba como Antiyas na Suriname, Salvador, Costa Rica y Jamaica. Na Aruba Watty a defende su isla contra equiponan di Brasil (Bangu, Fluminense), Bolivia, Peru, Ecuador, Colombia, Venezuela, Inglatera (Arsenal). Watty a semper a milita den e club local Aruba Jrs.

Musica, social y sindicalismo

Watty tambe a sa di gosa di fama como musico durante e temporada como integrante den e conhuntro Los Duques cual conhuntro a sa di gosa di un popularidad enorme na Aruba cual a pone tambe cu nan worde contrata p'e inauguracion di Aruba Caribbean Hotel.



Watty tabata fungi como drumer, cantante y manager. Watty tabata Vice Presidente di Jaycees di Antiyas Hulandes y miembro di directiva di Toastmasters di Aruba den cual organizacion el a forma su mes e.o. como orador publico.

Watty ta fundador di e prome directiva y di Centro di Bario di Playa Pabao na unda cu porcierto próximo aña lo celebra 30 aña di existencia. Watty tabata Presidente di sindicato di empleadonan di Gobierno di Aruba. (SEPA)

Empleado publico y abogado

Watty pa varios aña a cubri e posicion di sub-hefe di e departamento di Domeinbeheer. Su persona a fungi activamente como abogado durante e periodo 1989 pa 1994 trahando hunto cu e oficina Gonzalez, Zielinsky y Gibbs, aunke cu ya desde 1970 el a worde acepta como miembro di Bali y el a huramenta como tal.

Politica

Watty ta co-fundador di partido MEP, fundador di partido RUBA, cual despues na 1982 a uni forza cu partido AVP, partido cu Watty a keda miembro te cu su fecha di fayecimento. Watty a haci su debut den politica na aña 1971 ora cu su persona hunto cu sr. Betico Croes (q.e.p.d.), sr. Daniel Leo (q.e.p.d.) y sr. Efreem de Kort a funda partido MEP. Desde su debut den politica y te na eleccion di 1997 cual porcierto tabata e ultimo eleccion cu Watty a participa, semper el

a worde escogi cu votonan preferencial. Durante su carera den politica Watty a ocupa e siguiente puestonan; 1971- 1973 miembro di Eilandsraad, december 1973 - december 1975 Minister di Husticia y Vice Premier di Antiyas Hulandes den Gabinete Evertsz, mei 1976 - februari 1977 Diputado y alabes miembro di Eilandsraad, 1977 - 1985 miembro di Eilandsraad, 1 januari 1986 - februari 1989 Minister di Husticia di Aruba den Gabinete Eman I, februari 1989 - september 1994 miembro di Staten, 1 september 1994 - 6 januari 2001 Minister di Husticia y Obra Publico di Aruba den Gabinetenan Eman II y III.

Algun di e tanto proyectonan sea personal of a forma parti di nan 16 Di augustus 1975 despues di hopi contratempo Watty a sali victorioso, y a inaugura Scol di Polis na Aruba, cual porcierto desde 16 di augustus 2002 ta carga su number. Na september 1975 Watty tabata lider di e delegacion di Reino cu a delibera cu Venezuela e frontera maritimo entre Reino Hulandes y Venezuela. Tambe su persona como e unico politico di oposicion (RUBA) a forma parti di e delegacion Arubano consistiendo di Gobierno Insular di Aruba, sindicato y comercio y lidera pa sr. Betico Croes (q.e.p.d.), cu a biaha pa Hulanda despues di e sucesonan di augustus scur na 1977.

Tambe Watty tabata miembro di e

comision di Reino cu tabata atende cu e relacionnan estatal dentro di Reino Hulandes, esta e inter-eilandelijk top-overleg, Antilliaans-spoor. Como tambe miembro di e delegacion Arubano n'e dos conferencianan di Mesa Rondo na Den Haag, Hulanda, na 1981 y 1983. Na unda cu a fiha e futuro structura estatal di Aruba, cual resultado final tabata e Status Aparte.

Condecoracion y reconocimiento

Casi 30 aña Watty a sirbi e isla aki como politico, y sin lubida su aporte for di hoben caba riba e tereno di futbol, musica, social y sindicato. Tanto den politica como den e Cuerpo Ehecutivo y Legislativo di Antiyas Hulandes como esun di Aruba, varios t'e posicionnan clave cu Watty a sabi di eherce cabalmente, pa cualnan tambe varios t'e condecoracionan cu el a ricibi tanto for di Casa Real Hulandes como for di Gobierno Venezolano. Aki na Aruba Gobierno a honre cu e Scol di Polis na su number, cual porcierto Watty a funda na 1975 y e ringweg 3 cu ta carga e number Avenida E.J. (Watty) Vos, cual caminda porcierto den futuro sercan lo core for di crusada di aeropuerto Reina Beatrix te cu e crusada na altura di Fatum na Punta Brabo.

Invitacion

Por ultimo nos fundacion ta extende e invitacion pa un Sacrificio di Misa awe nochi pa 7or na Iglesia Catolico San Francisco na Playa.